

Edizioni

- letto 297 volte

Aston

Ren no val hom joves que no-s perjura
per salvar plus cant el tol sacramen;
e s'ieu per mal ni per paor de ven
covenc a Dieu qu'eu non chantes aura,
pos nostre temps si meillura,
trobarai que fort ai mespres.
Perdon me Dieu si l'ai repres!

En respeig son d'aver bon'aventura,
car ades ai maltrag e mon joven;
mas anc no-m plac sojornz entr'avol gen,
per c'ai maint jorn e mainta nuit escura
suffert e chaut e freidura,
qe-m loingnes de vil' e paes
per segre comte pro e cortes.

Jamais nuls hom non faria rancura
de mercadiers, so sai certanamen,
si vezia com gazaignon l'argen
ni co-s meton en mar ad aventura.
De tot me sui donatz cura,
can an bon temps e non l'an ges,
tot m'o teng a sojorn de pres.

Anc la bella ben feita per cintura
non desirei mais c'ara per un cen
non dezir mais e garbin e ponen,
et autres venz, can si fan per mesura.
Et nel port a gran largura,
c'om conosca can bons temps es,
En Blachas non o sap ges res.

S'anc baordei ni anei d'ambladura,
per caval pren nostra nau can cor gen,
e per escut la gran vela al ven,
e per lansa l'antenna fort e dura,

e per esperon l'amura,
e-ls timos prenc ades per fres
et per sella e per arnes.

- letto 262 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-60>